



Vischnaunca
Tujetsch

Protocol dalla radunonza da vischnaunca

dils 25 d'october 2023

allas 19.30 uras en Sala Cristalla a Sedrun

**Protocol dalla radunonza da vischnaunca dils 25 d'october 2023
allas 19:30 uras entochen allas 21:36 uras,
ella sala Cristalla a Sedrun**

Presidi: Martin Cavegn (president communal)

Protocollista: Simona Giossi

Dumbravuschs: Silvio Schmid e Reto Schmid

Presents: 52

Perstgisas: Desiree Willimann
Bruno Berther

Tractandas

1. Avertura
2. Lescha davart il provediment d'aua dalla vischnaunca da Tujetsch
3. Lescha davart la dismessa dallas auas piarsas dalla vischnaunca da Tujetsch
4. Orientaziuns
5. Varia

1. Tractanda Avertura / Beinvegni

Il president communal Martin Cavegn fa in cordial beinvegni a tuttas Tuatschinas ed a tuts Tuatschins ed als commembers dalla cumissiun da gestiun alla tiarza radunonza da vischnaunca dil trienni 2023/2026.

Naven dad ussa fagein nus mintga gada ina controlla d'entrada cun surdar cedels da votar, per aschia segirar che mo personas che han il dretg da votar prendan part allas votaziuns. Sch'enzatgi banduna la sala duront la radunonza eis el obligaus ni ella obligada da returnar il cedel ad in dils dumbravuschs per che quels sappien adattar il diember dallas personas presentas.

Il president communal constatescha che la radunonza ei vegnida convocada tenor las prescripziuns dalla costituziun communal, artechel 30, cun la publicaziun ella Tuatschina nr. 19 dils 29 da settember 2023, sco era entras la retschevida dil messadi en mintga casada dils 10 d'october 2023.

Ils posts da dumbravuschs sorprendan Silvio Schmid e Reto Schmid, commembers dalla cumissiun da gestiun.

Tenor art. 34 lit. b) alinea 4 dalla costituziun communal astga vegnir priu decisiun sulettamein davart las tractandas ch'ei stadas publicadas e ch'ei vegnidas predeliberadas dalla suprastonza communal.

Tenor art. 30 alinea 1 dalla lescha davart ils dretgs politics vegnan las votaziuns fatgas per ordinari cun maunpli. Tier votaziuns cun maunpli ei la pluralitad da quels che voteschan decisiva. Ein las vuschs ulivas, lu ei la damonda renviada.

Tenor art. 30 alinea 3 dalla lescha davart ils dretgs politics sa ina quarta dils votants presents pretender scrutini. Tier votaziuns cun scrutini decida il pli absolut dallas vuschs valeivlas. Ein las vuschs ulivas, lu ei la damonda renviada.

Tenor art. 35 litera n) dalla costituziun communal ha la radunonza da vischnaunca la cumpetenzza da suttametter las fatschentas alla votaziun all'urna. La pluralitad da quels che voteschan ei decisiva.

Tenor art. 24 dil regulativ da fatschentas pertuccont il cussegl da vischnaunca ch'ei vegnius abolius tenor la nova costituziun da vischnaunca, ei stipulau ch'ei ha per regla liug all'entschatta dalla deliberaziun ina debatta d'entrada. Enstagl d'ina debatta d'entrada, sa vegnir arranschau ina discussiun generala. Era sch'ei dat buca pli il cussegl da vischnaunca, vegnin nus ad agir en quei senn.

Tier mintga tractanda fa il president communal ni la geraua ni il genau responsabel ina presentaziun dalla fatschenta.

Silsuenter fa il president communal avon mintga tractanda la damonda, schebein ei vegn giavischau ina debatta d'entrada ni ina discussiun generala. Sche quei ei buca giavischau, vegn iu vi ella tractaziun.

Quei vegn ualti carteivel ad esser il davos protocol che vegn screts plaid per plaid. Alla davosa radunonza ei vegniu il giavisch da tener quels pli cuort. Nus havein gia tractau quella damonda sin suprastanza communal e dau suatientscha a quei giavisch. Vinavon vegnin nus a prender quella tractanda sin la proxima radunonza da vischnaunca per approvaziun.

Tier la tractanda dil protocol vegn sulettamein la part dalla protesta tractandada. Sch'ei dat neginas protestas enteifer 30 dis naven dalla publicaziun ella Tuatschina, ei il protocol approbaus automaticamein. Quei sin fundament dalla lescha surordinada dil cantun Grischun.

Oz prendin la presentaziun da omisduas leschas ensemen cun quei ch'ei van fetg in en l'auter. Tgi che ha legiu las leschas vesa che quellas corrispundan dalla sistematica ad in l'otra. Ei dat pia ina presentaziun all'entschatta da omisduas leschas. Il davos mond el atras artechel per artechel da mintga lescha.

2. Tractanda Lescha davart il providiment d'aua dalla vischnaunca da Tujetsch

President Martin Cavegn presenta la tractanda 2.

Il messadi ei vasts. Nus havein empruau da circumscriber la situaziun sur tut ora. La pendenza da reveder quellus duas leschas ei fetg veglia. Quella pendenza haiel surpriu da mes antecessurs. Il tema ei vegnius urgents per quei che nus havein duas protestas ch'ei fetg concernentas. Las protestas ein digl onn 2020 e 2022. La protesta digl onn 2022 pertucca ils quens d'aua. Igl ei vegniu protestau ch'ei vegn buca tschentau quen tenor il sistem dil caschunader. Ei vegn pia quintau giu tenor ina taxa fixa e buca suenter il consum, sco quei che la lescha federala dat avon.

Nus havein saviu far ina cunvegna a bucca cun ils recurrents. Nus essan secunvegna che la surpastanza communal tracta la revisiun dallas leschas aschi spert sco pusseivel. Las duas personas ein pia prontas da spustar las protestas e spitgar sin l'introducziun dallas leschas. La suprastanza communal havess en sesez stuiu prender in decisiun sin las protestas. Sche la suprastanza havess per exempel renviu la protesta, havessan ils recurrents tratg vinavon

il cass avon dertgira administrativa. Leu havess la vischnaunca spiars. Il principi dil caschunader ei definada ella lescha surordinada. La vischnaunca havess saviu trer vinavon il cass avon Dertgira Federala ed havess entochen il davos segiramein spiars. Sil pli tard lu, havess la vischnaunca aschia ni aschia stuiu reveder la lescha.

Reveder quella lescha era pia buca in giavisch che la suprastonza communalava leva exnum metter entuorn. Nus havein massa autras pendenzas da liquidar. Sch'ins vegn denton en ina procedura da protesta lu ston ins tener en terminis e cu ins fa empermischuns eis ei era da tener talas.

Las leschas che stattan oz en discussiun sebasan sil in reglement da muster dall'Associazion grischuna per ils svilup dil territori. La lescha ei pia buca inventada dalla suprastonza communalava. Nus havein giu grond agid d'igl advocat Placi Berther che ha gronda experientscha en caussa. Cu ins va els detagls dat ei adina ina massa lavur era sche las leschas ein en sesez pulit cuortas.

Las duas leschas sebasan sin ils medems principis ed aschia san in cumparegliar ellas fetg bein. Las leschas actualas corrispundan buca al principi dil caschunader ed aschia stuein reveder ellas. Sco gia menziunau havessan ins gia daditg stuiu tschappar quei enta maun. Cun las duas protestas inoltradas havein lu era effectiv stuiu far quei.

Ei dat in per decisiuns dalla Dertgira Federala. Lezza preveda che la dismessa dallas auas piarsas sto vegnir mesirada cun il consum. Co ins mesira il consum ei in punct ch'ins sa discussiunar. Las biaras vischnauncas han montau per quei dumbraders.

Il provediment dall'aua sto buca exnum vegnir mesiraus sche la vischnaunca – tier nus ei quei la corporaziun d'aua – ha mo minimals cuosts per metter a disposiziun ni preparar l'aua. La damonda ei, tgei ein minimals cuosts? Quei sa negin definir exact. Ina dertgira stuess decider tgei che minimals cuost ein. Zatgei caschuna adina cuosts, sco per exempel tschaffar ord ina fontauna l'aua, far in aquaduct e menar l'aua atras in bischel en in sistem. Lura seresultan cuosts digl aquaduct, cuosts da fontauna, forsa era cuosts da filters d'arsen e cuosts da bishels. Per mei ein minimals cuosts enzatgei auter che quei.

Cun il sistem vegl vegneva tschentau quen sebasond sin dus facturs. La taxa fundamentala sebasava sin la grondezia d'ina parcella. Tgi che haveva ina gronda parcella pagava dapli. La taxa da consum sebasava sin la mesira cubica dalla casa. Ins mava da quei anora, sch'ins ha ina gronda casa vivan dapli persunas en quella casa e drovan pia era dapli aua. Quei ch'ins sa sedumandar, sche numnadamein mo duas persunas vivan en ina gronda casa ei quei buc il cass. Denton era quei in sistem practicabel era quel secumprovaus bein.

Da niev ei quei auter. La taxa fundamentala sebase sin la valeta nova tenor il schazetg digl object. La taxa da consum sebase sin l'aua che vegn en casa. La taxa che pertucca il consum ei aschia segir pli gesta che avon. Tgi che drova bia aua paga dapli e tgi che drova pauca aua paga pli pauc.

Sin la grafica vesan ins duas lingias ch'ei veramein decisivas. La lingia melna muossa ils cuosts dil provediment d'aua che la corporaziun d'aua ha annualmein. Inagada eis ei bia ed inagada pauc. Ord quei motiv haiel mussau cun la lingia melna punctada la media dils cuosts sur ils onns ora. La color blava suren ein las entradas. Ins vesa che denter la lingia blava e melna ei ina differenza da ca. frs. 100'000.00 ad onn. La remessa che nus havein avon maun ei la lingia cotschna e quella ha cuntinuadamein priu tier ils davos onns. La medema situaziun havein tier la taxa da serenera e canalisaziun. La lingia brina muossa che nus havein dapi igl onn 2004 adina priu en dapli che quei che nus havein duvrau. Ord quei motiv ei la finanziaziun speciala dalla vischnaunca cun frs. 1.8 mill. avon maun. Cuort ressumau san ins dir, ch'ins ha recaltgau tier il provediment d'aua sco era tier la serenera e canalisaziun dapli daners che quei ch'ins duvrau. Ei dat ina statistica nua ch'ins vesa che la vischnaunca da Tujetsch ha las pli aultas taxas digl entir cantun Grischun. Quels che han fatg protesta ein lu secapescha era sereferi sin quella statistica.

La taxa fundamentala era avon ils m² dalla parcella. Uss sebase ella sin la valeta nova digl object. Quei ei in auter model da definir ina taxa fundamentala. Sch'ins pren ina casa da condomini cun habitaziuns da vacanzas sin ina relativ pintga parcella, lu pagavan tals ina fetg bassa taxa fundamentala, en relaziun cun igl indigen che ha in grond curtin ed ina casa. Sut circumstanzas era quei veramein buca diltut gest.

La taxa da consum sebasava sin in fixum dils m³, ei empurtava buca cons che habitavan en quella casa. Uss vegness montau in dumbrader che quenta giu l'aua consumada. Ina gronda casa che vegn habitada dad ina persuna en relaziun cun in hotel che ha biars hosps, denton ina pintga mesira cubica ei buca diltut ina valeta gesta. Ei era denton in sistem practica ch'era vegnius approbaus e che funziunava per quei ch'el deva buca lavur.

Vegl e niev ei buca il medem denton vegnin era en la lescha nova ad esser decisiv con aultas las tariffas vegnan fixadas.

Ils dumbraders d'aua cuostan ca. frs. 300'000.00. Per l'installaziun havein quintau cun frs. 300.00. Per la vischnaunca sco era per la corporaziun d'aua dat quei in quen ulivau. 1'000 uras vegnan cumpradas per frs. 300.00. Silsuenter retrai la corporaziun ca. frs. 30'000.00 ad onn per las uras e la lavur. En diesch onn ein quels dumbraders amortisai.

Per vus, che haveis da pagar l'installaziun ei quei secapescha buca per nuot. In effect ha ei, ei vegn spargnau aua ed energia.

In sbagli ei seschluitaus el messadi. Nus havein mess tier ils quens dil provediment d'aua frs. 30.00 per il dumbrader, denton ein quels buca da pagar tier ils quens dalla canalisaziun. Schiglioc vegness ei incassau dubel.

Ina explicaziun pertuccont las tariffas. Tier la taxa fundamentala havein tschun classas d'object. Simplificau ei la classa 1 la hoteleria e la classa 2 ein las habitaziuns e casas. Nus havein dumandau la segirada da fiug per survegnir ils schazetgs ed aschia era las valetas novas. A Tujetsch havein total valetas novas da 1 miliarda francs. Cun il factur da 0.04 promil dess quei rodund frs. 400'000.00.

Tier la taxa da consum havein era las medemas classas. Nus havein bia habitaziuns e casas denton paucs objects gronds. Ina casa d'ina famiglia indigena drova ca. 250 m³ ad onn ed ina casa da vacanzas ca 25 m³ ad onn.

La taxa fundamentala ha da curclar ils cuosts da liunga vesta, vul dir las investiziuns e la taxa da consum ha da curclar ils cuosts sin cuorta vesta. La Dertgira Dederala ha decidiu tier il cass dalla vischnaunca da Lai, che la taxa fundamentala astga buca esser pli aulta che 75% dil total dallas entradas.

La rama dallas tariffas ei ina caussa ch'ei dada avon dalla lescha. Denton la definiziun dalla tariffa singula stat sura alla suprastanza communal. Nus havein giu bia sesidas e fatg bia calculaziuns. Pil mument eis ei grev da dir tgei tariffas prender. Nus savein tochen il mument dad oz buca exact con ch'il schazetg ei en mintga classa e nus savein era buca conta aua che vegn duvrada.

Definar la summa dalla taxa entochen che quella corrispunda alla relaziun da 75%/25% drova segir in onn da calcular, tochen ch'ei constat. Perquei vulein nus installar ils dumbraders aschi spert sco pusseivel, aschia havein in onn resultats che indicheschan a nus il consum. Aschia savein definar pli exact la summa dalla tariffa. La suprastanza communal ha da tractar mintg'onni da niev la l'altezia dalla tariffa. Ins vul buca che las taxas s'augmentan senza fin.

Ressumau vesis che nus havein in pèr posiziuns ch'ei buca aschi claras per nus. Denton vegnan quellas applicadas daferton tier. Vus vesis tier ils exempels che la hoteleria ed il commerci savessan pagar pli ch'il dubel. Casas e habitaziuns pagan pli pauc. La damonda ei,

con solidarics ein possessurs da casas e habitaziuns da schar alzar la taxa en favur dalla hoteleria e dil commerci? Quella discussiun vegnin aunc a menar.

Ils exempels el messadi ein veramein exempels e buca aunc quei che vala il davos. Nus levon simplamein mussar en tgei direcziun ch'ei va culs quens. Cul quen vegn, dat ei da quels che selegran perquei ch'el ei vegnius pli bass, denton era da quels ch'ei pli pauc cuntents cun quei ch'il quen ei pli aults. Sur tut ora spargnan casas dad indigens 10% e casas da vacanzas 15-30%. Casas da colinia pagan ca. 100% dapli, hoteleria e commerci 150-200% dapli. Nus vegnin a definir las tariffas aschia che nus prendin en rodund frs. 100'000.00 pli pauc ad onn. Nus stuein sbassar las taxas.

Ina cuorta survesta dil temps. Nus havein oz la radunonza da vischnunca. Priu il cass che las leschas vegnan approbadas, savein entscheiver cun la montascha dils dumbraders. Lezza duei esser a fin miez igl onn 2025. Il secund semester 2025 vegnin nus a far las controllas ed aunc mesiraziuns provisoricas. Il 2026 savein mesirar ed egl emprem quartal digl onn 2027 savein tschentiar igl emprem quen. Quei vul dir ch'ei dat igl onn 2026 per la vischnunca neginas entradas. Quei ha lu secapescha influenza sil preventiv resp. sin las finanzas. Nus tschentein per il quen definitiv e buca ordavon in quen provisoric.

Ina cuorta resumaziun dalla presentaziun:

Las duas leschas ston vegnir revididas perquei che nus havein leschas surordinadas che pretendan quei. Il niev sistem da taxas ei pli simpels e capeivels. Cun ils dumbraders corrispunda la taxa da consum alla lescha che pretenda il principi dil caschunader. Sche nus stuein metter en dumbraders per la dismessa d'aua lu savein era duvrar lezza mesiraziun per tschentiar quen per il provediment d'aua. Tschei fuss ina ortgadad da montar dumbraders mo per la dismessa denton buca per il provediment. Ils cuosts per la vischnunca e la corporaziun ein mudests. In effect supplementar ei ch'ins spargna il davos aua ed energia.

Quei fuss stau l'introducziun dalla lescha. Nus mein uss ella tractaziun. Emprems fuss da tractar la lescha da provediment e sunter la lescha dalla dismessa. Denton eis ei clar che quei va in en l'auter. Bugen mondel atras artechel per artechel dalla lescha aschia che nus savein sclarir las damondas che vus haveis.

Tractaziun

Negina tractaziun ei giavischada

Debatta d'entrada:

Pius Cavegn, convischin da Camischolas:

Preziau president, preziai commembers dalla suprastanza e prezias convischinas e convischins.

Ordavon engraziel per il clar messadi e per la buna orientaziun entras il president. Jeu sundel buca encunter l'introducziun dils dumbraders. Quei ei cumandau si a nus. Denton para zatgei a mi curios e disturba mei. Il dumbrader vegn furnius dalla corporaziun. Il possessur sto denton mirar sez che quel vegn installaus. Ina persuna persula sto lu seglir suenter d'in installatur ed era pils jasters ei quei pli grev dad organisar. Fuss ei buca pli simpel sche la corporaziun schess, ch'ella metta il dumbrader a disposiziun e procura medemamein per la montascha. Era sch'ei ston aunc adossar ina taxa supplementar sigl'emprems quon. Quei fuss segidau cul convischin. La corporaziun sa handlegiar meglier cugl installatur ed aschia procurar per in preci ulivau per tuts. Schiglioc sto Giachen pagar dapli e Pieder pli pauc. Jeu lessel supplicar da ponderar quella idea. L'ovra electrica tschenta era buca quon per installar il dumbrader d'electricitad.

Martin Cavegn, president communal:

Engraziel Pius, jeu prendel bugen posiziun. Nus havein discussiunau tia damonda ditg e liung. Il problem ei, che en quei mument che la corporaziun d'aua ei responsabla e sto installar 1'000 dumbraders vegn ei fetg complicau da coordinar. Indigens pon ins aunc tier tgunsch, denton contonscher ils convischins da habitaziuns da vacanzas ei quasi nunpusseivel. Nus vegnin ad informar mintga persuna ed era a metter a disposiziun ina gliesta cun numeras da telefon da firmas che monteschan dumbraders. Per la corporaziun eis ei buca pusseivel da mirar cun 1'000 casadas, far giu termin e coordinar cugl installatur. Quei ei buca realisitc e la corporaziun ha era buca las ressursas da far quei. Nus dein in onn e miez peda alla populaziun da montar ils dumbraders. Ei sa buca esser ch'ei vegn adossau la lavur e la responsabladad alla corporaziun d'aua. Sche mintgin ei sez responsabels partin nus si la lavur sin biasas firmas e buca mo sin ina. Nus sperein veramein che vus sustenis quella varianta. Perquei che nus havein studegiu sin suprastanza uras vi ed eneu co far quei il pli practicabel per tuts.

Silvio Schmid, convischin da Sedrun:

Preziau president, preziai commembers dalla suprastanza e prezias convischinas e convischins. Jeu haiel ina damonda formala sco dumbravuschs. Oz dat ei duas votaziuns pertuccont duas leschas. Tgei schabegia sch'ins di oz ad ina lescha gie ed a tschella na?

Martin Cavegn, president communal:

Quei ei en sessez sempel. La lescha che vegn approbada vegn messa entuorn. Sche la radunanza da vischnaunca di na ad ina lescha, sto la suprastanza prender ina decisiun en la protesta inoltrada. Quella protesta vegn lu a setschentar avon dertgira e lu sesanflein en dus,

treis onns puspei cheu nua che nus essan oz. Tgi ch'ei lu president sto dir, che vus haveis lu negina letga da buca approbar quella lescha.

Silvio Schmid,

La lescha dalla dismessa dallas auas piarsas sebasa gie sin la taxa da consum. Sch'ei dat leu in gie e tier la lescha dil provediment d'aua in na, savess ins gie schar lezza sco ella ei entochen da cheu? Lezza havess negina consequenza perquei ch'ella sebasa buca sin la lescha dalla dismessa.

Martin Cavgen, president communal:

Sche nus approbein buca la lescha dil provediment lu vegn igl empren recurrent a trer vinavon il cass. La vischnaunca savess dir sin basa dalla Dertgira Federala, stuessan nus buca montar uras sche nus havein cuosts minimals. Denton ein quels cuosts minimals buca definai en la decisiun e dattan aschia spazi d'interpretar. Jeu pretendel che nus havein ella Val Tujetsch buca cuosts minimals. Renviar la protesta sin basa d'ina decisiun dalla radunonza da vischnaunca ei in motiv che gnanc vala. Ins stuess lu argumentar e mussar si daco ch'ins renviescha la protesta cun facts che valan. Igl ein ina differenza sch'ins pren aua ord in lag e sto luvrar si quella sco aua da beiber. Ni sche nus savein retrer l'aua ord ina fontauna e nazzegiar lezza sco aua da beiber. Tut quei caschuna tenor miu manegia buca cuosts minimals ed aschia sperdessan nus era quei cass.

Theodor Berther, convischin da Camischolas:

Preziai tuts presents. L'Aua Cristalla ei nies aquaduct grond. Denton havein era aquaducts privats sco a Cavorgia, Milez, Bugnei ni era tier certs mises. Vegnan quels mises lu era colligiai? Sco per exempel mises che han la canalisaziun che va en serenera. Han quels la medema obligaziun?

Martin Cavegn, president communal:

Tier tia damonda pertuccont ils mises dundel bugen il plaid al Guido. Da principi vala quella lescha per tuttas corporaziuns. Ina lescha surordinada vala per tuts.

Guido Monn, genau:

Preziau president, preziai commembers dalla suprastonza e prezias convischinas e convischins. Quei ei veramein empau ina spinusa damonda. Nus dalla corporaziun d'Aua Cristalla havein buca quei cass. Jeu stossel forsa schar rispunder il Silvio Schmid quella damonda. Denton sco jeu haiel enconuschientscha ston era lez installar dumbraders. Sch'els quentan giu ei auter, san ei far quei. La lescha vala denton per tuttas corporaziuns.

En zona da baghegiar havein nus l'obligaziun che tuts objects ston pagar vid la canalisaziun. Leu savein differenziar denter aua piarsa ed aua da fecalias. Era l'aua piarsa ha ina lingia d'aua. Mintgin che ha in baghetg en zona da baghegiar sto pagar la colligiaziun. Ei dess ina excepziun, sch'ins sa sfundrar l'aua. Tgi che drova negina aua sto era buca pagar per tala. Sch'el ha denton ligiau las canals vid la canalisaziun da meteo sche lu stol pagar tenor la nova lescha. Tier tegias e mises saiel buca propi giudicar. Jeu haiel denton il sentiment che buca biaras tegias ein colligiadas vid la canalisaziun.

Martin Cavegn, president communal:

Da principi stat ei scret en la lescha che mintga object ch'ei colligiaus cun la lingia d'aua ha da installar in dumbrader. Sche nus havein in clavau amiez il vitg che ha en ina lingia d'aua e di ch'el drova buca ella, lu ha el da prender ora il sclusaduis e lu ha el buca da pagar. Sche l'aua da meteo sfundra, stuess el metter si ina canal. Igl ei uras che nus havein clar determinau quellus situaziuns. Ressumau savein dir: Tgi che survegn oz in quen survegn era el futur in quen. Tgi che ha en ina lingia da provediment d'aua ha d'installar in dumbrader. Tgi che ha en negin dumbrader, ferton ha l'aua da meteo che va en la canalisaziun, sto era pagar per quella. Nus havein gie ina obligaziun da sparter auasch tschuffas e auas da meteo (Genereller Entwässerungsplan). Ord quei motiv stuein sanar nossas vias da quartier e trer dapart l'aua da meteo e l'aua tschuffa. Sch'in sa dir che sia aua sfundra, lu ha tal era buca da pagar taxa da canalisaziun. Nus havein giu endamen quels cass denton stuein lu aunc mirar co sliigar els.

Guido Monn, genau:

Jeu lessel aunc cumpletar ina caussa. La lescha veglia ha menziunau tgei objects ch'ei buca colligiai vid l'aua. Tgi che ha survegniu ils davos onns quen ed era buca colligiaus, pagava per la taxa dall'aua da stizzar fiug. Quella taxa havein strihau ord la nova lescha. La corporaziun tschenta buca pli quen per quels cass.

Martin Cavegn, president communal:

Negin ella Val Tujetsch ha ina fontauna privata. Respectiv ei dat fontaunas privatas ferton sauda l'aua alla vischnaunca.

Guido Monn, genau:

Quei constat buca diltut. Jeu saiel ch'igl Alpsu, il Sudada e foras Milez han ina fontauna privata.

Vendalin Giossi, convischin da Camischolas:

Preziau president, preziai commembers dalla suprastonza e prezias convischinas e convischins. En connex cun la tegia che jeu haiel si Mulinatsch havevel giu ina pulita dispeta.

Nus essan buca colligiai cun la serenera e la canalisaziun denton havein stuiu pagar. Tut tschels possessurs da tegias han era stuiu pagar. Jeu haveval fatg tut il pusseivel per buca stuer pagar ed erel ius vinavon cun quei cass.

Jeu possedel in aquaduct privat che vegn en tegia. Jeu sundel buca obligaus da metter en in dumbrader? La survitut digl aquaduct da Milez ei buns ed igl ei era da quintar che nus stuein schar installar in dumbrader. Quei ch'ei era gest.

Martin Cavegn, president communal:

Engraziel Vendalin. Ella lescha veglia ei in artechel che preveda clar, che in object ch'ei buca colligiaus vid la canalisaziun ha era da pagar ina taxa da colligiazium. Cura che quella lescha ei vegnida fatga han ins vuliu sapientivamein che possesurs d'ina tegia han da pagar ina taxa da colligiazium. Quella lescha ei vegnida approbada aschia. Ina taxa fundamentala ni da consum vegn lu suenter buca incassada pli.

Guido Monn, genau:

Nus stuein differenziar. Quei che ti Vendalin ha detg ei la taxa da colligiazium e tschei ein taxas annualas. Quei ei aschia, tuts che han ina tegia pagan la taxa da colligiazium. Suenter supponel ch'ei han da svidar e metter l'aua ella serenera e pagan lu tenor ils m³ ch'ei han da dismetter.

Martin Cavegn, president communal:

Quei ha schon ina certa logica. Ins ei buca colligiaus denton van ins cun l'aua tschuffa ella serenera e paga per tala. Ig ei ina minimala cefra ch'ins ha da pagar per in tanc da mises. Ina tegia da mises va giu cun ca. 2-3 m³ e paga lu ina pintga taxa per m³.

Placi Berther, convischin da Camischolas:

Preziau president, preziai commembers dalla suprastanza e prezias convischinas e convischins. Nus essan tier la debatta. Bugen lessel prender il plaid e declarar in per caussas e puncts principals. La lescha veglia ei digl onn 2003. Quei ei ina fetg cumplicada lescha. Che ha en damondas d'avertura da vias, damondas dalla corporaziun e dalla anteriura ovra electrica Tujetsch. Sch'ins sfeglia atras la lescha croda en egl ch'ella ei pulit cumplicada. Da sias uras era quei denton ina buna lescha, denton stons ins simplificar quella. Ozildi mettan ins buca pli aschi bia materia en ina lescha, avon onns vegneva quei denton practicaui auter. La giuridificaziun semida era e va cul temps. Las leschas pigl ambient vegnan pli impurtontas che inagada. Il principi dil caschunader ei pli e pli fetg in tema e la pli semplia via da mesirar lez ei da montar in dumbrader. Quei ei in svilup dalla societad. Bia glied ei buca cuntenta, sch'els san buca leger giu clar conta aua ch'els han duvrau. Sch'ins ha mo taxas fixas lu dat ei glied che fa protesta, sco quei che la vischnaunca da Tujetsch ei vegnida secunfrontada ils davos

onns. Per quei eis ei veramein uras d'adattar quella lescha. La lescha nova corrispunda a musters e cumparegliazions dad autras vischnauncas. Vischnauncas turisticas sco Mustér, Breil, Lumnezia e Laax han tuts leschas tenor il principi dil caschunader e quellas ein secumprovadas. Da tschei maun drova ei peda da drizzar en tut e mirar tgei tariffas ein lu las bunas. Denton ei la rama l'impurtonta. Sil feigl dalla tariffas vesan ins la rama dada ed en quella rama vegn la suprastanza ad adattar la taxa da consum. Quellas cumpetenzas stuein nus dar alla suprastanza. El mument dad oz sa la suprastanza buca definar tgei classa ha da pagar con. Igl impurtont ei scol president ha gia menziunau, ch'ei dat sur tut ina reducziun da 10%. Quei ei zatgei legreivel. La lescha veglia ha caschunau alla vischnaunca ina reserva, tgei ch'ei era buca schliet per las finanzas dalla vischnaunca. Quei ei en sessez ina situaziun confortabla e da l'autra vart havein cullas novas leschas in bien instrument per la suprastanza communal. Ins duei exnum dir ad omisduas leschas gie. Dir mo ad ina lescha gie ed a tschella na ei ridicul. Jeu savessel buca dad ina vischnaunca che havess mo approbau la lescha per il provediment e la lescha per la dismessa mass suenter in vegl sistem.

Aunc tier la damonda che mintga privat ei responsabels per l'installaziun. Quei ha era da far cun la damonda da submission. Sch'il maun public pren enta maun l'installaziun, ston els scriver ora la damonda. Ina firma dalla bassa ei lu pli bien marcau e survegn l'incarica. Ei va cheu per evitar ch'ina firma profitescha da tutta lavur. Ins vul che biaras firmas indigenas vegnan risguardadas.

Mia proposta ei d'approbar quellas duas leschas. Quei ein leschas modernas che simplificheschan era la lavur sin l'administraziun. Il convischin ei cuntents da saver pagar il quen suenter il principi dil caschunader. Quei ei adequat al temps dad ozildi.

Martin Cavegn, president communal:

Engraziel Placi per tias explicaziuns. Dat ei aunc discissions ni propostas da buca entrar en la fatschenta? Quei ei buca il cass. Jeu mondel bugen atras artechel per artechel dalla lescha e vus s'annunzieis tier damondas. Jeu entscheivel cun la lescha dil provediment d'aua. En tut ein quei 35 artechels.

President Martin Cavegn prelegia ils tetels dils artechels 1 entochen 25 dalla lescha davart il provediment d'aua dalla vischnaunca da Tujetsch. Tier artechel 25 taxa da colligiazion per l'aua ha convischin Pius Cavegn ina damonda.

Pius Cavegn, convischin da Camischolas:

Preziau president, preziada suprastanza. El messadi stat scret che la taxa fundamentala astga contonscher 75% dalla taxa generala. Quei sebase sin la Dertgira Federala. Per nus indigens eis ei convegnent sche la taxa fundamentala ei relativ aulta e la taxa per l'aua da provediment

bassa. Quei corrispunda als cuosts che nus havein. En la lescha vesel jeu denton negliu che quels 75% fissan fixai. Jeu quitassel ei cunvegnent sch'ins menziunas ella lescha che la taxa fundamentala munta silmeins ils 75% che la Dertgira federala lai tier.

Martin Cavegn, president communal:

Ils 75% dalla taxa generala sebasan sil cass da Lai. La Dertgira Federala ha definau 30% – 70%. En quei seracass han els decidu max. 75% per la taxa fundamentala. Jeu quetel ei impau malsegir da definir exact quels procents. Nus vegnin ad applicar ei aschia che nus havein la relaziun da 75% e 25%. Egl art. 25 va ei en sessez per la taxa da colligaziun e buca la taxa da consum. Mo engraziel per tia damonda. Jeu quetel ei malsegir da fixar la taxa ella lescha. Bugen dundel il plaid al Placi. Co vesas ti quei, per mei ei quei empau ina resca.

Placi Berther, convischin da Camischolas:

Preziau president, preziai commembers dalla suprastanza e prezias convischinas e convischins. Jeu fixassel era buca ils 75%. Jeu haiel viu che la vischnaunca da Sumvitg ha definau sin siu fegl da tariffas 75% e 25%. Quei ei denton buca in'obligaziun perscretta dalla lescha cantunala ni federala. Lezzas leschas dian ch'ins sto ir suenter il principi dil caschunader. Els dian semplamein ch'ins sto mesirar il diever.

La relaziun dallas entradas che secumponan dalla taxa fundamentala e la taxa da consum sto tenor lescha buca vegnir definada sin 75% e 25%. Il surveglader da prezis metta era a disposiziun scartiras che interpreteschan la partiziun dils cuosts. Quella partiziun schessel jeu denton aviarta ella lescha. Ei sa dar il cass ch'in jester vegn in onn buca en vacanzas. Lu ei la taxa fundamentala segir pli aulta ch'ils 75%. Forsa schizun sin 99% tier quei cass. Lu savess quei pertuccont dar en protesta che quei seigi illegal. Jeu sun perschuadius che la dertgira dess buca suatientscha a quel. La dertgira di ch'ins sto crear sempels models. En quels sempels models sa ei dar cass nua ch'ei va buca si cun quels 75% e 25%.

Martin Cavegn, president communal:

Engraziel Placi. Vegnir exact sin 75% vegn buca ad esser pusseivel. Gliez fuss ina nundetga lavur da calcular atras tut che quei mass si gest. Sche nus vegnessan lu buca da contonscher ei e fissan intec sura, lu havessan in problem, perquei che nus cunterfagein alla lescha. Nus lein clar sebasar sin quels 75% e 25%. Sche nus reducin tuttenina la taxa en classa dus lu stuein sedumandar ei quei legal? Daco ei l'aua en in hotel pli bienmarcau che en ina casa, quei stuessan ins lu argumentar avon in derschader. L'aua vegn numnadamein ord la medema fontauna ed ord il medem bischel. Quei vegn ad esser in fetg grond pensum da calcular ed interpoler che quei va si. Nus havein gia investau nundetg temps da far models e da calcular.

Pius Cavegn, convischin da Camischolas:

Jeu capeschel che quei ei buca aschi sempel denton fassel cuntents sche quei vegn era protocollau aschia. La taxa fundamentala duei star ella dimensiun da 75%.

Martin Cavegn, president communal:

La protocollista sa francar quei sco segir el protocol. Quei ei en mintga cass egl interess dalla suprastonza communal.

President Martin Cavegn prelegia artechel 26 tochen artechel 35 dalla lescha davart il provediment d'aua dalla vischnaunca da Tujetsch.

Jeu lessel aunc menziunar l'annexa. Era per il protocol in punct impurtont, l'annexa tier la lescha davart il provediment d'aua sebase sin igl art. 23 e buca sin igl art. 24 sco quei ch'ei scret el messadi.

L'annexa ei partida si en las taxas da colligiaziun d'aua cun las differentas classas d'object. Leu havein ina rama tier la taxa da colligiaziun da 1.00% – 3.00%. Nus havein giu ina seduta speciala per mirar co definir las taxas. Nus havein decidiu che nus fagein neginas midadas tier las taxas da colligiaziun. Tier punct 2 havein las taxas annualas pil provediment d'aua. Vus vesis la taxa fundamentala da 0.10 promill tochen 0.40 promill. Lu vesis sut punct 2.2 la taxa sin consum, leu havein frs. 0.15 tochen 1.20/m³. En nossa proposta da calculaziun havevan mess en frs. 0.40/m³. Nus havein aunc tariffas specialas per aua da baghegiar, retratga d'aua dil hidrant, fontaunas privatas ed implonts senza valeta da schazetg. Sut 2.3 affitaziun annuala per il dumbrader d'aua havein definau che nus quintein frs. 30.00. En tut las vischnauncas che havein mirau han ei en frs. 30.00. La cefra va era si bein perquei che nus havein frs. 300'000.00 per 1'000 uras e quei dat frs. 300.00 per montar, pia ei l'affitazin frs. 30.00. Quei va pia si calcuratoricamein bein.

Quei ei la rama che la suprastonza communal sa semover. Quella adattaziun vegn ad esser ina caussa che nus calculein mintg'onn da niev. La finamira ei clara, nus recaltgein ca. frs. 600'000.00 per la taxa da canalisaziun e serenera. Nus havein taxas dil provediment d'aua da frs. 300'000.00 e nus lein reducir sur tut ora per 10%. La suprastonza ha la pusseivladad da far excepziuns sch'ei dat cass extraordinaris. Ha zatgei aunc damondas pertuccont l'annexa?

Hans Jacomet, convischin da Sedrun:

Preziau president, preziai commembers dalla suprastonza e prezias convischinas e convischins. Ch'ins ha da pagar la taxa dalla aua ch'ins drova ei clar. Jeu vesel denton in problem che nus indigens havein in iert e duvrein aua per bugnar tal. Ils jasters vegnan si cheu e pagan ina fuera e nus paghein ina massa. Jeu creiel ch'ins astgass schon reglar empau la

taxa fundamentala. Igl indigen che stat cheu e paga taglia ha in iert e drova bia aua. Jeu sundel sco indigen en in disavantatg.

Martin Cavegn, president communal:

Quei ei in impurtont punct da protocolar. Nus havein era giu quellas discussiuns. Denton ei tiu argument gest quel che ha caschunau las protestas ch'ei vegnidas inoltradas a nus. Ils possessurs da secundas habitaziuns dian, ch'els vegnan tier nus paucas jamnas ad onn e ston pagar gest aschi bia sco ils indigens. Ella classa 2 ein tut las habitaziuns en. Nus astgein buca differenziar denter in indigen ed in possessur d'ina habitaziun da vacanzas. Nus savein differenziar denter las classas denton savein buca dir ch'il possessur dalla habitaziun da vacanzas ha da pagar dapli. Quei fuss buca legal.

In ulteriur vischin:

Daco san ins reducir tier ils hotels?

Martin Cavegn, president communal:

Leu havein las differentas classas. Casas da habitar ston tuttas esser en ina classa. Nus savein buca far ina classa 2 e dir leu ein tuttas casas e habitaziuns dad indigens e lu far ina classa 3 e dir leu ein tuttas habitaziuns e casas da buca indigens. Igl ei da tractar tuts tuttina. Nus astgein buca far ina lescha nua che nus discriminein zatgi. Nus havein exact giu tut quellas discussiuns sin suprastanza. Il sulet che savein far, ei da tener la taxa fundamentala sin maximum 75% ed aschia reducir la taxa dil quantum dil consum. Cura che nus havein da reveder la lescha da turissem e da hosps havein forsa la pusseivladad da far in pèr midadas. Quella lescha lein era tractar proximamein.

La radunonza da vischnaunca decida d'approbar cun 49 vuschs gie, encunter 2 vuschs na ed ina abstenziun la lescha davart il provediment d'aua dalla vischnaunca da Tujetsch.

3. Tractanda Lescha davart la dismessa dallas auas piarsas dalla vischnaunca da Tujetsch

President Martin Cavegn prelegia ils tetels dils artechels 1 tochen 32 dalla lescha davart la dismessa dallas auas piarsas dalla vischnaunca da Tujetsch. Tier artechel 32 taxa annuala da consum per schischom colligiau, ha convischin Reto Schmid ina damonda.

Reto Schmid, convischin da Sedrun:

Preziau president, preziai commembers dalla suprastonza e prezias convischinas e convischins. Sco jeu interpreteschel vegn la taxa definada sul quantum che l'aua entra en casa. Quei ei buca diltut correct per definar conta aua che banduna la casa. En nies menaschi duvrein fetg bia aua per exempel per producir paun. Ed era in puresser drova bia aua cunquei che las vaccas beiban tala. Haveis fatg ponderaziuns pertuccont quels cass?

Martin Cavegn, president communal:

Giebien, quei havein nus fatg. Sch'ei dat cass specials, nua ch'ins sa mussar si che tut l'aua vegn buca menada ella canalisaziun san ins risguardar quei. En general mein nus da quei anora che l'aua che entra la casada banduna era la casada. Ei sa denton dar cass sco tier tei Reto, ni era aunc auters exempels, nua che buca tut l'aua vegn menada anavos ella canalisaziun. Ins savess per exempel dumbrar l'aua che entra e quella che banduna cun dus dumbraders. Nus stuein analizar quei cass per cass ed ei duei esser gest.

Reto Schmid, convischin da Sedrun:

En nossa fatschenta vapurisescha l'aua entras ils process da produenziun aschia menein nus pli pauc aua en la canalisaziun che quei che nus retrein.

Martin Cavegn, president communal:

Quellas discussiuns havein nus giu. Ei dat da quels cass specials nua ch'il volumen dall'aua che entra la casa corrispunda buca dil volumen che banduna la casa. Nus havein la pussevkladad d'installar dus bumbraders. Quei stuein nus aunc mirar co far exact.

Guido Monn, genau:

Quei ei ina giustificada damonda e veramein in cass pli special. Ti has aunc numnau ils purs. Tier quels va l'aua ch'il menaschi drova ella „puschiner“.

Sche ti Reto sas mussar si che l'aua vapurisescha entra ils process da produenziun e ch'ei setracta din volumen significant, lu eis ei segir justificau. Aschia in cass ston ins perseguitar e sche ti sas mussar ora cons m³ che quei fa ora sin la valeta san ins discussiunar surda quei.

Martin Cavegn, president communal:

Tier las biaras casadas ei quei buca il cass che la bilanza d'entrada e d'extrada dall'aua variescha aschi significant. Tochen uss has tiu buca menziunau quei tema. Buc?

Reto Schmid, convischin da Sedrun:

Jeu haiel fatg attents sin quei cass duront la radunonza generala dall'Aua Cristalla.

Martin Cavegn, president communal:

Quels cass specials vegnan tractai separau e nus anflein ina sligiazion gesta.

Guido Monn, gerau:

Ti Hans havevas menziunau zatgei pertuccont bugnar curtins. Sch'ins drova 100 m³ da bugnar in curtin lu savessas evitar cuosts cun quei che l'aua flassegia buca ella canalisaziun. En cumparegliaziun cun ils cuosts dall'aua, per exempel 100 m³ ein frs. 0.25. Aschia vesan ins ch'il dumbrader cuosta ad ins dapli che l'aua ch'ins drova.

Martin Cavegn, president communal:

Sche tuts drovan 100 m³ per bugnar il curtin lu havessan negina aua pli. La vischnaunca da Tujetsch drova rodund 300'000 m³ aua en tut.

President Martin Cavegn prelegia ils tetels dils artechels 32 tochen artechel 38 dalla lescha davart la dismessa dallas auas piarsas dalla vischnaunca da Tujetsch.

En l'annexa sebasond sin art. 24 vegn tractau las tariffas dallas taxas. Jeu haiel gia menziunau che las duas leschas ein fetg bein cumperegliablas. En quella annexa ein denter auter era las taxas da colligiazion discretas. Forsa aunc ina remarca sin la discussiun cun Hans Jacomet: Quellas taxas han caschunau tier nus nundetga discussiun. La lescha veglia haveva definau quater differentas classas. Metter en ils endretgs objects en quellas classas ei fetg grev. Per exempel la classe 4 che ha en baselgias, capluttas, museums, bibliotecas etc. Igl ei special ch'ins fa ina classa nua ch'ei vegn duvrau bunamein negina aua.

Sco proxim ei descret las taxas annualas per auas piarsas cun la taxa fundamentala, la taxa sin conum e la taxa pauschala. Quella vegn duvrada per baghetgs senza dumbrader d'aua ch'ei colligiai cun la canalisaziun. Sco gia detg ei il princip general: Nua ch'in baghetg ei colligiaus via la reit d'aua, vegn era montau in dumbrader.

En quella rama vegnin nus lu a definir las taxas egl onn 2026. Nus sperein che nus gartegein fetg bein quellas taxas aschia che las relaziuns constattan.

Damondas tier la annexa?

Ciril Hendry, convischin da Sedrun:

Stimada suprastanza, preziai convischins e convischinas. Jeu vi aunc vegnir anavos sin igl art. 11 „auas piarsas schubras“. Tier las biaras casas va l'aua da tetg e l'aua dal conduct dall'aua sfundrada (Sickerleitung) aunc adina en la canalisaziun. Promova la vischnaunca da schar sfundra quellas auas per exempel en curtin? Savess ins lu reducir la taxa dalla dismessa da l'aua.

Martin Cavegn, president communal:

Quella discussiun da schar sfundrar l'aua havein nus era giu. Quei ei denton ina greva caussa. Nus havein era discussiunau la situaziun ch'ins rimna l'aua dil tetg en ina buot per bugnar igl iert. Tgei fan ins denton sche l'aua va surora?

Jeu dundel bugen quella damonda al Guido. Nus stuein en general parter si las auas da meteo e las auas da canalisaziun.

Guido Monn, genau:

Sfundrar ei ina pusseivladad. La taxaziun sto denton tuttina vegnida pagada. L'aua da fecalias sto vinavon vegnir menada ella canalisaziun. Aschia vegn menau pli pauc aua en la canalisaziun. Nus savein denton buca far quella differenza en la taxaziun perquei che nus stuein baghegiar in conduct separau per auas schubras. Sch'ei vegn colligiau vid quella lingia ni buca, fa buc ora bia.

Martin Cavegn, president communal:

L'aua dil tetg vegn buca dumbrada, ei vegn mo dumbrau l'aua che vegn cun in bischel en casa. Tschella aua vegn buca dumbrada, mo quella dil provediment d'aua.

La radunonza da vischnaunca decida d'approbar cun 47 vuschs gie, encunter 4 vuschs na ed 1 abstenziun davart la lescha dalla dismessa dallas auas piarsas dalla vischnaunca da Tujetsch.

Martin Cavegn:

La radunonza da vischnaunca ha decidu. Jeu vesel nua ch'il problem ei. Quei ei il commerci. Leu vegnin nus naturalmein ad haver discussiuns: Con solidarics essan nus enviars il commerci e con fa quei ora? Co savein nus vegnir encunter al commerci e co savein nus midar giu quei? Las quantitats en la lescha ein stadas fetg grevas dad eruir. Sche nus havessan la pusseivladad dad alzar ils cuosts tier las habitaziuns da vacanzas e sbassar ils cuosts tier il commerci, fagessan nus quei.

Jeu vi engraziar al Placi Berther che ha susteniu nus da elavurar la nova lescha. Quei ha dau ina nundetga lavur ed jeu sun fetg cuntents che nus havein giu enzatgi che ha giu investa en quella lescha ed era en bia autras. Nus havein giu entginas protestas, mo las duas numnadas han fatg che nus havein stuiu agir. Nus vegnin uss a prender si contact cun las corporaziuns e mira co applicar quei. Ina damonda ei cun tgei sistem ch'ins sa far l'administraziun da quellas taxas. Ina pusseivladad ei che l'Aua Cristalla ha access sin las datas dalla vischnaunca per l'administraziun.

Orientaziuns:

Vus haveis saviu leger ella gasetta che nus havein dau giu la damonda da baghegiar dil project „SedrunSolar“ tiel cantun Grischun. Cu nus havein realisau, ch'igl ei pusseivel da sviluppar in tal project, havein detg che nus essan ils emprems che dein giu la damonda da baghegiar.

Quei ei stau la finamira sur tut ora. Nus havein fatg squetsch dapertut, nus havein mess ensemen in team da project cun Claudio Deplazes, che meina quei project cun Ciril Deplazes e Martin Cavegn e naturalmein tut ils ingenieurs dallas firmas Reech, XStatic sco era Erwin Monn.

Nus essan i giu Cuera per surdar la damonda da baghegiar ad Adrian Cadosch che lavura tiel cantun. Aschia havein nus saviu surdau ils documents en in act simbolic. Silsuenter essan ir a tscheina per festivar in tec quei di. Sche nus cumparegliein il secund project che nus havein cun l'AXPO, vesan ins ch'ils gronds ein buca adina ils megliers. Nus havein giu il cletg dad esser in team che ha saviu luvrar fetg proffesiunal, efficient e spert. Aschia havein contonschiu nossa finamira ed essan ils emprems. Nus havein fetg bunas referenzas e per mei dat ei nuot auter che da gratular a tut ils responsabels da l'energia alpina sco era da l'administraziun communal. Igl uffeci da baghegiar e nus tuts havein fatg il pusseivel.

La damonda da baghegiar ei uss giu Cuera e vegn tractada. In motiv che nus vulevan esser ils emprems ei, che quei ei ina nova procedura e negin sa aunc propi co tut va. Sche nus havessan emblidau enzatgei, lu essan nus ils emprems che vegnin visai vi e nus savein aunc furnir suenter ei. L'energia alpina ei uss vid la calculaziun e spera da survegni la lubientsch egl 1. quartal 2024 (mars, avrel). Ins auda mintgaton che quels indrez rendien nundetg. Quei corrispunda buca ala realitad. Per quei stuein nus calcular fetg bein e analisar las rescas. Per tut prezi realisein nus buca quei project. Nus savein buca ir en memia aultas rescas e baghegiar aschia in project era sche nus survegnin da frs. 60 mil. 60% frs. 36 mil. dil stadi. Ina damonda ei era sche nus realisein quei project cun l'energia alpina ni sche nus creein ina nova societad. Quei ein tut aunc temas che ston vegnir elavurai. Igl emprem pass ei fatgs e nus havein gronda reconuschienscha en l'entira svizra per quella prestaziun. Aunc inaga in grond engraziement. Nus fagein buns pass, l'emprema finamira ei contonschida.

Valtgeva:

Nus havein ier giu radunonza dil cussegl d'administraziun dallas pendicularas Andermatt-Sedrun Sport AG. Jeu sun uonn puspei vegnius elegius dalla suprastonza communal sco representant. Vail Resorts lavura fetg professional. Ei vegn luvrau fetg detagliu ed ils americans fan pér las investiziuns cu ei vesan ch'ei porta era fretg e renda. Vail Resorts di clar, ina spunda sco Valtgeva ei emprema classa e perquei han ei era investau. Il niev baghetg da l'ustria ei sin buna via. Nus sperein che nus essan en l'ustria sin la sesiun. Era ils indrez da nevar vegnan a fin uonn. Valtgeva vegn aschia in liug da sentupada nua che nus havein fatg grondas investiziuns (rodund frs 4.5 mil.). Baghegiu ei spert. Nus stuein denton era haver la gliעד che dat scola da skis e lavura en quels loghens. Quella gliעד sto esser gastaders, honzels sco era agir professional. Cheu stuein nus tuts segidar per che quei gartegia.

Ier havein discussiunau sur dil „capital plan“, quei vul dir il plan dil capital d'investiziuns. Il remplazzament dallas sutgeras da Val Val ei ina fetg gronda sfida cunquei che nus stuein aunc baghegiar lavineras da mintga maun per total 4-5 mil. Il management dallas pendicularas di claramein: „ Nus vulein investir e survegnin buca las lubientschas. Cun la carischia da 5% per onn svaneschan ils daners, els valan nuot pli e tut vegn pli car“. Era cheu ei la vischnaunca fetg sut squetsch e nus empruein cun tut ils mieds da survegnir las lubientschas. Vail Resorts ein perschudi da far suandontas investiziuns: midada dils indrez da nevar, sanar l'ustria da Milez e remplazzar sutgeras. Cheu ein els perschudent vidlunder, mo els fan ei fetg professional ed igl american investescha buca avon ch'el enconuscha ils facts. La collaboraziun functionescha fetg bein ed jeu sun fetg satisfatgs da quei che jeu vesel. Nus fagein tut il pusseivel per realisar ils projects dalla vart dil Grischun. Quei vesan il Uranes denton era ed emprovan era da far investiziuns da sia vart sco per exempel sanar il Gemsstock etc.

Cunquei ch'ei vegn discurriu engles ellas sedutas haiel jeu in grond avantatg e sai spert metter en mes patratg sin engles. Aschia sperel jeu da saver representar ils interess dalla vischnaunca da Tujetsch schi bein sco pusseivel aschia che las investiziuns vegnan fatgas da nies maun. A vus tuts, a l'ASS ed al Silvio Schmid in grond engraziament. Cheu vegn prestau ina gronda lavur en favur da nossa vischnaunca. Jeu astgel buca emblidar l'administraziun communal che sto bia gadas tener neu il tgau cu ei va buca tgunsch ed ei duvrass lubientschas.

Vinavon vi jeu orientar vus pertuccont la lescha da parcar e da campar. Vus survegnis il proxim temps in pign cudischet cun en tut las informaziuns:

Co functionescha il sistem da parcar, nua ein ils parcadis, con ditg san ins parcar gratuit, con cuostan ils parcadis, san ins parcar cun carta, san ins parcar sur notg. Quei ei descret en quei cudischet.

Georg Bearth ei staus fetg ditg vid introducir la lescha da parcar e campar. Jeu hai sutschazegiau con bia lavur quei dat. Far la lescha ei ina caussa, meter entuorn quella dat denton fetg bia lavur. Nus vegnin era aunc ad informar ella Tuatschina pertuccont la lescha da parcar e campar. Ad el in grond engraziament.

Resort Dieni:

Las lavurs e la procedura per la lubientscha da baghegiar drova uss tut las ressursas da l'administraziun communal. En ina seduta cun igl uffeci da baghegiar hai jeu ier detg che tut las lavurs actualas vegnan messas din maun ed ei vegn mo pli luvrau vid la lubientscha da baghegiar dil resort da Dieni. Uss stuein nus far tut per che nus savein dar la lubientscha da baghegiar schi spert sco pusseivel. Perquei duvrein nus quellas ressursas naven d'immediat e schi ditg sco ei drova ellas. Nus sperein ch'il pievel e tuts han capientscha sche vus telefoneis sin canzlia ni sin uffeci da baghegiar e survegnis la risposta che nus prendin posiziun schi spert sco nus vegnin vidlunder. Quei ei in avis da mia vart. Nus stuein uss metter tut sin via aschia che nus vegnin da dar quella lubientscha. Per quei duvrein nus uss dapli ressursas. Nus havein era stuiu stuschar la proxima seduta dalla cumissiun da baghegiar.

Guido Monn, genau:

Preziai tuts, jeu less informar sur dils cuosts actuals dalla sanaziun dil bogn. Il cussegl da vischnaunca haveva dau suatientscha igl onn 2022 an ina summa da 9.81 milliuns. Sin fundament da quei havein nus entschiet a trer en offertas e calcular ils cuosts ed havein constatau ch'ils cuosts suvargan malamein.

Sin il finistrel vesis vus quei ch'ei vegniu ensemen entras las offertas, suenter ei la caraschia ed igl index vegni vitier. Quei ha dau ina summa totala da 12.454 mil. ch'il Martin Cavegn ha giu informau. Uss ein rodund 97% dallas lavurs surdadas aschia che nus savein ca. nua che nus setschentein. Sin fundament da quei essan nus el mument tier cuosts da 12.21 mil. ed havein aunc ina pintga pintga reserva da frs. 242'000.00. Quei tuna forsa da bia, cun far in tec quen vesan ins denton che quei ein mo 2% sin 12 mil. Nus havein oz giu cumissiun dil bogn nua che jeu vulevel dar ora frs. 6'000.00 dapli. Ei han denton buca dau la suatientscha per quei. Nus essan fetg stregns cun las finanzas e dein buca ora daners ch'ei buca controllai. La cumissiun stat rigurus vid il project aschia che nus savein tener en ils cuosts. Per il mument vesa quei ora bein, nus havein era buca giu surpresas auter ch'ina mutaziun dil KV da frs. 13'000.00 che nus havein dau suatientscha la stad vargada. Quei ei stau la suleta summa nua che nus havein dau ora enzatgei dapli. Vus veseis che nus stein vidlunder e pil mument vesa ei ora fetg bein. Las firmas cun lur luvriers ein sil bogn e dattan tut il pusseivel per ch'ils termins san vegnir teni en. Tochen uss ei quei era il cass +- 4 dis, quei ch'ei fetg bien per aschia in project.

Igl unviern ei datier ed els ston dar tut per tener en vinavon ils termins. Tochen uss hai buca dau supresas specialas che han dau dapli lavur.

Martin Cavegn, president communal:

Jeu less engraziar a las firmas da baghegiar. Il Hubert Solèr ch'ei cheu presents e sil bogn il responsabel polier e sa bugen dar vinavon quei engraziament per tut igl engaschi. La planisaziun ed il menaschi ein exemplarics e nus essan sin buna via cun la glieud cumpetenta che nus havein. Nus essan fetg cuntents e sperein che nus vegnin a dumignar quei tenor plan.

La proxima radunonza da vischnaunca ei ils 6. da december (s. Clau). Nus havein stuiu stuschar quella radunonza per duas jamnas. Nus vegnessan nunpusseivel da finir il messadi ad uras sche havessan tenu en il datum dils 22 da november 2023. Nus havein giu il discletg che nus havein a l'entschatta digl onn giu negin canzlist per 3 meins. Uss hajel jeu la Simona Giossi che seglia ell'aua freida mintga di ed uss havein aunc giu ina conlvrera che ha fatg in accident ed ha stuiu vegnir operada. Nus queintein ch'ella sa pér puspei luvrar a l'entschatta digl onn 2024.

Nus essan il mument tuts fetg occupai e dein tut per finir il preventiv. Il preventiv ei specialmein uonn ina gronda sfida. Sche nus cumpereglein las cefras d'il tscheins d'aua digl onn 2022. Entstagl sco budgetau 1.5 mil. Francs havein nus mo giu entradas da frs. 600'000.00. Tier l'energia alpina havein nus era giu pli pauc gudogn. La situaziuns cun bia entradas nua che nus savevan far remessas supplementaras havein nus uss cun la midada dil clima buca pli. Jeu hai gia detg bia gadas a la radunonza da vischnaunca: „cu ei plova, plova ei daners“. Oz plova ei denton buca pli aschi fetg sco avon onns. Cunquei ch'ei ha egl onn 2023 puspei buca pluviu en las dimensiuns usitadas d'avon onns ha la suprastonza stuiu reducir quellas entradas per la mesadad el preventiv. Era las entradas da l'energia alpina havein nus stuiu reducir.

A l'entschatta dil preventiv astga mintga genau metter en tut las investziuns giavischadas. Quei ei intec sco da Nadal. Suenter vegn ei denton discussiunau e debattaun fetg tgei investziuns ein propi necessarias. Cheu vegn ei mirau da buca dar ora ina da melli damemia.

Sche quella tendenza cun pli e pli pauc entradas havess da restar aschia sur ils proxims decenis stuein nus seser ensemen e mira co nus sligein quei. Quei vul dir ch'ei dess ina midada fundamentala. Forsa havein nus uss denton era budgetau memia pessimistic ed igl onn 2024 vegn in super onn hydraulic. Pli bugen pli bia entradas che pli pauc, mo nus stuein uss reagar sin quellas midadas da situaziun e quei vegn ad esser ina sfida. Nus vegnin a luvrar ora il preventiv digl onn 2025 la primavera 2024. Lu havein nus las cefras dallas ovras aschia che nus savein reagar ed informar il pievel e far ina radunonza da vischnaunca nua ch'ins savess discussiunar tgei mesiras che nus prendin. Nus stuein differenziar denter il quen annual ed il quen d'investziuns. Las investziuns che nus fagein han da far cun la liquiditad e las reducziuns

che nus fagein. Sche nus investein per exempel 12 mil. el bogn sche affectuescha quei biabein frs. 180'000.00 cuosts d'amortisaziun el quen annual. Ei fuss denton falliu dad uss buc investar vinavon en quels projects che nus havein priu avon da far.

Nus havein buca mo giu ina gronda lavur da rimnar tut las cefras e tschentar ensemen, mobein era da pliras radunonzas en suprastonza tochen che nus essan stai perina. Nus havein aunc ina seduta pertuccont il preventiv tochen nus vegnin a sancziunar e suenter suonda aunc ina seduta cun la cummisiun da gestiun che fa era aunc damondas criticas enviers il preventiv. Nus vegnin a tarmetter il messadi cun il preventiv ed era graficas che declaran.

Varia:

Pius Cavegn, convischin da Camischolas:

Questa stad han ins savius perseguitar nua la „scala dalla KVR“ che la nova vischina, che ha baghegiu entuorn la stala, ha serau si il passadi cun ruogs da fluras. Jeu less sco vischin da Camischolas far attents che quella scala exista schi ditg sco jeu sai seregurdar. Jeu haiel gleiti 70 onns. Quella scala meina nus giu la KVR, pli baul mavan ils luvriers dalla surbaghegiada „la Sidlig“ sin lur plaz da lavur. Il Mario era in dils davos che mava da quella scala giudo. Oz mo paucs che van da leu giadora. Nus havein denton bia infrastruttura da sport giu leu: la loipa da cuorsa liunga, il vitaparcours e la senda NEATural. Quei ei in passadi per contonscher quella infrastruttura el center da nossa val. Jeu less motivar la suprastonza da star sin las combas davos e buca schar serar si quella vischina il passadi. Jeu vi aunc suttastrihar enzatgei. Jeu hai questa primavera fatg ina damonda per meter si ina tabla per mussar quei access dalla senda NEATural. Quei ei uss bunamein in miez onn vargau ed jeu haiel aunc viu nuot e saiel buca sco il stan ei cun quella tabla.

Martin Cavegn, president communal:

Engraziel Pius. Jeu sai dir, nus havein reagau ed havein gia la sligiazion. Mo quella laschel jeu declarar il Guido.

Guido Monn, genau:

Engraziel Pius per tias orientaziuns. Las tablas stuessan esser empustadas e tenor mia informaziun era gia montadas. Forsa maunca aunc ina mo jeu sclareschel giu quei. Sas ti dir nua che la tabla maunca?

Pius Cavegn, convischin:

Tier quei passadi ei montau negina tabla.

Guido Monn, genau:

Bien, tier quei passadi. Nus havevan gia budgetau egl onn vargau da far leu enzatgei. Quella scala vulevan nus surprender dalla KVR. La KVR ha detg che nus savein surprender quella scala e far cun quella tgei che nus vulein. Uonn sundel jeu staus sil plaz sin envitaziun dils vischins da quei liug. Els han lu detg che nus havein buca il dretg dad ir atras da quella senda. La vischnaunca ha giu traeschau el temps che la migliuraziun ei vegnida mezza en vigur. Lu ha la vischnaunca buca mess atras quei dretg. La scala ei ida vi tiel possessur dil prau. Il dretg dalla KVR ei restaus mo la vischnaunca ha buca schau purtar en il detg ch'ei en zona da baghegiar. Aschia ei quei iu a piarder.

Nus havein denton anflau ina sligiazion cun la possessura dil prau. Lezza ei segidada fetg cun nus. Oz ei stau publicau in'annunzia per far ina senda sper la via cantunala giu. Avon la punt dalla via cantunala meina la senda enviars la punt dalla loipa e naven da leu dil flum giuadora ella via. Sin quella via eis ei era pusseivel dad ir giuadora cun ina crotscha ni cun velo. Nus havein denton l'obligaziun da baghegiar anavos la scala. Leu havessan nus tuttina stuiu investir daners per sanar quella. Quei ei uss la sligiazion. La possessura dil prau lai ir atras siu prau cun la cundiziun che nus baghegiein anavos la scala. Nus stuevan tuttina far enzatgei cun la scala. Las cazzolas dalla scala vegnin nus era a demontar. La convischina ha detg clar che nus havein buca il dretg dad ir atras quei liug. L'energia alpina ha denton il dretg dad ir tochen la staziun da transformatur en quei liug.

Jeu sperel che quei cuntenta tei aschia. Nus havein ina sligiazion dad ir da leu giuadora a pei ed aschia cuosta ei a nus pli pauc che da mantener la scala ed aschia savein nus era tener aviert igl unviern quella senda.

Martin Cavegn, president communal:

Martin Cavegn muossa sin la carta nua che la senda nova sesanfla.

Ti Guido has detg che quei vegni fatg entschatta november. Nus havein anflau ina sligiazion ch'ei buc aschi mala. Nus havein era la lubientscha da far intec pli lartg la loipa en in tschancun. Sas ti Guido aunc declarar co ils cuosts da baghegiar anavos la scala vegnan purtei?

Guido Monn, genau:

Nus havein fatg ina damonda a l'Axpo sche els fussien culants e separticipeschien vid ils cuosts da baghegiar anavos la scala. Giuridicamein eis ei vegniu sclariu che la Axpo sto far nuot vi quella scala perquei che la scala ei ida vi el possess dalla possessura dil prau cun la migliuraziun.

Jeu sun dil meini che nus havein anflau ina buna sligiazion. Forsa separticipescha la KVR in tec pauc vid ils cuosts sch'els ein culants e schiglioc sto la vischnaunca surprender tut ils cuosts.

Martin Cavegn, president communal:

Forsa ei la senda suenter bunamein megliera dad ira che uss.

Pius Cavegn, convischin:

Quei ei ina nova informaziun. Engraziel fetg. Jeu fuss staus trumpaus sche nus da Camischolas havessan buca pli giu quei passadi, perquei che quei ei ina scursanizium per l'infrastructura da sport. Engraziel.

Hans Jacomet, convischin:

Jeu sedamondel tgei schabegia cun la ruina dil vitg? Savess ins buca far ezatgei cun quei magliac tratsch. Quei ha si in pastg ed jeu quetel ch'ins stuess far leu enzatgei. La glied tila aunc viden miardas e quei vesa buca ora bein.

Martin Cavegn, president communal:

Leu sai jeu era informar. La procedura ei aschia. Nus havein stuiu far attents els sin la decisiun dalla dertgira e dar la pusseivladad da quella firma da baghegiar anavos quei. Igl ei vegniu fatg nuot e nus havein buca survegniu ina risposta sin quei. Uss havein nus tratg en offertas per baghegiar anavos quei. Nus havein stuiu comunicar ad els ch'els san prender posizium sin quellas offertas. Quei vul dir che nus stuein dar il schinumnu „rechtliches Gehör“. Sco jeu sun vegnius informaus havein nus udiu nuot. Nus astgein buca selubir da far sbagls en quei cass difiicil. Sche nus massen sil plaz e fagessan enzatgei savein nus sebarschar la detta. Nus seresdein miniziusamein cun nossa advocata pass per pass per che nus tschentein buc ina pusseivladad da vegni attacai. La vischnaunca ei da principi obligada da baghegiar anavos il plazzal. Quei caschuna bia cuosts e quels stuessan nus far valer. Nus essan vid evaluar l'endretga tactica co ir vinavon en quei cass.

Cunquei che nus astgein buca far sbagls vegn la vischnaunca buc ad ir cun ina maschina sin quei mantun.

Ei vegn buca giavischaun pli il plaid.

Martin Cavegn, president communal:

Jeu lessel engraziat cordialmein per vies temps e per prender part alla radunonza e giavischel in bien reuotrn a casa. Aschia siarel la raduononza da vischnaunca.

Protocollista:

Simona Giossi

President communal:

Martin Cavegn